

МЕКТЕП ТЫНЫСЫ

№ 22 (49) Қаңтар, 2018 жыл



«Жүрген жанның артында ізі қалар, Жүйрік өлсе, артында сөзі қалар»

М.ЖҰМАБАЕВ



М.Жұмабаев атындағы №39 гимназия



Биылғы жыл гимназиямыздың жылнамасында елеулі жетістіктерімен есте қалары сөзсіз. Ел тәуелсіздігінің 26 жылдығы қарсаңында гимназиямыздың басшылары үлкен марапаттарға ие болды. Тәуелсіз Қазақстанның рухани және әлеуметтік дамуы жолында қол жеткен табыстары және оның гүлденуіне қосқан зор үлесі үшін гимназиямыздың директоры, **БАЗЫЛ ЖАНГЕЛДІ САҒЫНТАЙҰЛЫ** Қазақстан Республикасының білім министрінің **ҚҰРМЕТ ГРАМОТАСЫМЕН** марапатталды. Абыройыңыз асқақтай берсін демекпіз!

ҚР Тәуелсіздігі мерейтойына орай педагогтардың озық іс-тәжірибесін тарату мақсатында ұйымдастырылған «**МӘңГІЛІК ЕЛДІң МӘРТЕБЕЛІ МҰҒАЛІМІ**» жобасында ұстаздық шеберлігін, шығармашылық ізденісін жоғары дәрежеде танытқаны үшін директордың оқу ісі жөніндегі орынбасары **УАТАЕВА ГҰЛНАР СҰЛТАНМҰРАТОВНА** құрмет грамотасымен және жобаның арнайы медалімен марапатталды. Гүлнар Сұлтанмұратовнаны шын жүректен құттықтаймыз!



ТӘУЕЛСІЗДІК – ТӘУЕТЕР ЖАЛҒЫЗ КИЕМ



Гимназиямыздың ұлағатты ұстазы,
Омарова Гүлнара Меңдібаевна да
тәуелсіз Қазақстанның рухани және
әлеуметтік дамуы жолында қол жеткен
табыстары және оның гүлденуіне қосқан
зор үлесі үшін ҚР білім министрінің
құрмет грамотасымен марапатталды.
Еңбегіңіз елене берсін, Гүлнара
Меңдібаевна!

Гимназиямызда Тәуелсіздік күні қарсаңында
«Елімнің бақытын тербеткен – Тәуелсіздік»
атты мерекелік кеш өтті. Кешті ұйым-
дастырушы 8 «Ә», 6 «Ә» сыныптары мен
жетекшілері Жақишева Ж.К., Әлімбетова А.Ж.
әр нәмірге жауаптылықпен қарап, жоғары
деңгейдегі үлкен кештің себепшісі болды.
Баршаңызды ұлы мерекеміз – Тәуелсіздік күнімен
құттықтап, тәуелсіздігіміз тұғырлы болсын деп
тілейміз!



Елім менің

Айдын шалқар, күміс баулы бұлағы,
Шөбі шүйгін жасыл-желек құрағы.
Мыңғыраған малы жайлау жайлаған,
Сондай еді қазағымның тұрағы.

Еліміз де күннен-күнге құлпырды,
Кере алмай көршілер де тор құрды.
Содан болар Қайрат сынды батырды,
Абақтыда талай гүлді солдырды.

Жұлдыздайын жарқ еткен ақындарды,
Алмас қылыш, айбынды батырларды.
Жер аударып, бастырып, бас көтертпей,
Естідік біздер талай атылғанды.

Осындай қорлықпенен келген теңдік,
Соңында шыдамменен біздер жеңдік.
Ерлердің есімдерін өшірмеуге,
Айбатымыз асқақтап біздер келдік!

Тәуелсіздік – мәңгілікке берілген енші емес,
халықтың мамыражай кепілдігі. Тәуелсіздікті
алу үшін қаншама қазақ батырлары көз жұмды.
Олар бізді осы күнге жетсін деп тер төкті.
Азаттық – еркіндік. Осы уақытты армандаған
асылдардың қазір көңілі тыншыды. Өздері
көрмеген тыныштықты, біз көріп отырмыз.

Қазағым менің ерлеген,
Намысын қолдан бермеген.
Қаншама батыр жалмаған,
Тойымсыз екен жер деген.
Соларды мақтан тұтатын,
Саналы ұрпақпын мен деген.

Тәуелсіздік жайлы жырлап, көңілге тиюге,
жүректі тебірентуге, сезіндіруге болады. Бірақ,
майдандағы ардагерлер сезінген қиындықты,
апаларымыздың аяғынан өткен желтоқсанның
сызын сезіне алмаспыз. Олармен тек мақтана
аламыз, есімдерін өшірмеу үшін жанымызды
салуды борышымыз санаймыз!

Абулхайр АДАМБАЕВ,
6 «Б» сынып оқушысы.

2

Ділназ АХАНОВА,
6 «Ә» сыныбы

**...САҒАН ЖЕТУ ҚИЫН БОЛСА
ҚАНШАЛЫҚ,
САҚТАП ТҰРУ ҚИЫНЫРАҚ
ОДАНДА!**

ҚАЛҚАМАН САРИН



«Еліңнің ұлы болсаң, еліңе жаның ашыса, азаматтық намысың болса, қазақтың ұлт ретінде нығайып-көркею жолында жан терінді сығып жүріп еңбек ет. Жердің де, елдің де иесі өзің екенінді ұмытпа!» - деп елбасы айтқандай, біздің мақтан тұтарымыз, бүгінгіміз бен келешегіміз – ол біздің тәуелсіздігіміз. Өз отанымыз жайлы мақтанып айтар тұсымыз көп, ал бұл елдің ертеңі біздің қолымызда. Мемлекетіміздің тәуелсіздігі – халқымыздың бақыты. Жер бетінде қанша ұлт болса, соның барлығының арманы - тәуелсіз ел болу. Ал сол арманға біздер жеттік. Әрқашанда тәуелсіз еліміздің тағы нұрлы, ұрпағының еңсесі биік, көкірегі ояу, керегесі кең, терезесі тең болса екен деп армандаймын. Осы оңайлықпен келмеген жеңісіміздің қадірін білуге шақырамын!



*Мерей МЫНБАЕВ,
6 «Б» сынып оқушысы*

«Мен қазақтың» деген әрбір жанның жүрегінде «Тәуелсіздік» сөзін естігенде толассыз сезім орнайды. Себебі, сонау алмағайып кезеңдерде қазақ халқы үшін қымбатқа түскен, ғасырлар бойы ата-бабаларымыздың аңсаған арманы болған осы тәуелсіздік еді. Біз бұл кезеңді көрмесек те, қазақтың өз еліне деген махаббатын ешқашан ұмыта алмаймыз. Қазақтың киелі жері үшін жандарын қиған жастарды ұмыту мүмкін емес! Бірақ өмір бойы осыған қайғырып өтудің де қажеті жоқ деп ойлаймын. Тарихты қазбалай беру бізге не береді. Қазақ айтады: тірі адам тіршілігін жасау керек. Ең бастысы, біз жаңа мыңжылдыққа егемен ел, тәуелсіз ұлт болып қадам бастық. Шүкір! Алла тағала бізге сондай ұланғайыр кең жерді нәсіп еткен екен. Енді сол жердің әр тасын, әрбір гүлін қорғауға біздер міндеттіміз!



*Сабина ФАЙЗУЛЛАЕВА,
7 «А» сынып оқушысы*

Тәуелсіздік – ең алдымен қазақ халқының бостандыққа ұмтылған асқақ армандары мен қайсар рухының жемісі. Сондықтан да біз үшін Тәуелсіздік күні – ең қастерлі күн. Еліміз тәуелсіздіктің бесігінде тербелгелі 26 жыл. Осы жылдар ішінде қазақ елі етек-жеңін жиып, шекарасын бекітіп, өз алдына дербес мемлекет болды. Бұл атадан келе жатқан ұлы жеңістің жемісі. 1991 жылы ел тәуелсіздігін алған уақытта қазақ халқы ғана емес, барша түркі елі қуанды. Ендеше, бізді барша мемлекет қолдады деген сөз. Іргесі енді қаланған жаңа республиканың әрі қарай өмір сүруі үшін көп еңбектену керек болды. Ол еңбек жасалды деп ойлаймын. Тәуелсіздік – ашы термен келген тәтті сый. Төгілген қанның, өлмеген жігердің отымен келген ұлы күн!




*Айлана КАБЕНОВА,
6 «Б» сынып оқушысы*

ЕЛІМ ЖАЙТЫ ЖЫРЛАСАМ...

Тәуелсіз біз ел болдық,
Ел намысын сақтайық,
Қазақстанның байлығын,
Өзге елге сатпайық,



Еліміздің батырларын,
Жаңғыртайық, қолдайық,
Халқымыздың салт-дәстүрін,
Қарашықтай қорғайық.
Мәңгілікке тату-тәтті,
Елдің бірі болайық,



Суретті салған ЗЕРЕ Алимбаева

Қазағымның жетістігін,
Зор мақтаныш тұтайық,
Себебі біздің қазақ елі,
Мақтануға лайық!

Сақтаған АҚНҰР,
7 «А» сыныбы



Суретті салған Алибек ШАКЕНОВ,
5 «Ә» сынып оқушысы

Мен өзімнің ата-бабаларыма шексіз алғыс айтқым келеді. Олардың бізге жасаған жақсылығын қалай қайтарсақ екен?! Қазақ елінің тәуелсіздігі үшін жанын қиған асыл азаматтар мен аяулы әпкелеріміз қаншама. 17-18 жасқа да қарамай елі үшін отқа түскен аға-апаларымыз мәңгілік біздің жадымызда. Олардың жасаған ерліктері бізді ғана емес, әлемді таң қалдырған. Ләззат, Сабира, Қайрат, Ербол сынды Желтоқсан құрбандарының ерлігінің өзі елдігіміздің ерен көрсеткіші. Мен қазіргі жастарға қарап отырып, яғни өзіме сыни көзбен қарасам, олар жасаған қадамға бара алмас едім. Сыз кешіп, ызғарлы қарды жалаң аяғыммен баса алмас едім деп ойлаймын. Ендеше, біз, осы тәтті күндеріміз үшін, бақытты шақтарымыз үшін батыр бабаларымыз бен аналарымызға, аға-әпкелерімізге қарыздармыз.

7 «Ә» сынып оқушысы Айана ЕРЕКЕ



Суретті салған Айғаным СМАГУЛОВА,
7 «А» сынып оқушысы

Желтоқсанның тым ызғарлы желінде,
Ұлт қамы үшін барған еді ерлікке.
Талай қазақ жігіттері қан төкті,
Тәуелсіздік аларына сендік пе?!
Тәуелсіздік – ол біздің елдігіміз,
Егемендік – ол біздің теңдігіміз.
Қайрат пен Ербол сынды батырларға,
Ұрпақтың атынан алғыс шексіз!

Алуа ТУСУШБЕКОВА,
6 «А» сынып оқушысы



4

Құтты болсын тәуелсіз мерекеміз,
Арта берсін мызғымас берекеміз.

Күш-жігер өн бойында сарқылмаған,
Бойымызда намыс бар жарқылдаған.

Желтоқсанның сол кездегі ызғары,
Соны ойласам ет-жүрегім мұздады.

Көңілімнің келмейді бұрауы шын,
Қорқынышпен уланып тұр-ау ішім.

Әрбір істі зердеге алып қарайық,
Екі көзге жас келіп тұр халайық.
Тәуелсіздік жолында жанын қиған,
Ерлерімізді есімізге алайық!

Ануар ТАЛҒАТҰЛЫ,
5 «Б» сынып оқушысы

ҚАНАТҚА ҚАЙРАТ, ҰМТЫЛЫСҚА ҰШҚЫН



2017-2018 оқу жылында М. Жұмабаев атындағы №39 гимназияда 15 жалпы білім беретін пәндерден Республикалық олимпиадасының I кезеңіне (мектепшілік) гимназия бойынша 457 оқушы қатысты.

Ал 2016-2017 оқу жылында 398 оқушы қатысқан болатын. Білім олимпиадасын өткізудің мақсаты-гимназия оқушыларының жоғары деңгейдегі олимпиадаларға дайындығын жақсарту мен барлық бағыттағы олимпиадаға қатысушылардың резервін қалыптастыру. Міндеттері: оқушылардың пәнге деген қызығушылығын арттыру, ғылыми көзқарасын, танымын кеңейту, шығармашылық қабілеттерін, ғылыми

ізденісін дамыту, оқушы бейіні мен қабілетін анықтау, интеллектісін дамыту, білімді жасты даралау, ынталандыру, қабілетті, дарынды оқушыларды айқындап іріктеу және қолдау көрсету, мектеп оқушыларының ғылыми жұмысқа деген қызығушылығын ояту, ұлттық білімді дамыту, дарынды жастардың өз қабілеттерін жүзеге асыруына көмектесу болып табылады.

15 жалпы білім беретін пәндерден Республикалық олимпиаданың II кезеңінің (қалалық) олимпиадасына 8-11 сыныптар аралығында 15 пәннен 2016-2017 оқу жылында 36 оқушы, 2017-2018 оқу жылында 40 оқушы жолдама алды. Алғашқы оқу жылында 9 оқушы жеңімпаз атанып, Хасенова Мадина облыстық кезеңде бақ сынап, жүлделі екінші орынға ие болды. Гимназиямыз 2015-2016 оқу жылында «2016 жылғы ең үздік олимпиадалық команда» атағына ие болған болатын. 2017-2018 оқу жылында 16 оқушы жеңімпаз атанды. Биылғы оқу жылында бастауыш сынып оқушылары арасында да олимпиаданың қалалық кезеңі ұйымдастырылып, екі оқушымыз жүлделі орыннан көрінді. Сапарғали Ердан 3 «в» сынып оқушысы 3-ші орын алса, Жанысбай Ақнұр 4 «ә» сынып оқушысы 2-ші орын иеленді.

Бұл гимназия тарихындағы жоғары жетістік болып саналады. 5-б қаңтар аралығында Республикалық олимпиаданың III кезеңіне (облыстық) 5 оқушымыз жолдама алып, бұл кезеңді жоғары нәтижемен аяқтады. Қазақ тілі мен әдебиеті пәнінен 11 «ә» сынып оқушысы Тлеуова Жаннұр, орыс тілі мен әдебиеті пәнінен Тулеуова Айнұр 10 «а» сынып оқушысы мен Ансаям Назерке 11 «б» сынып оқушысы, Қазақстан тарихы пәнінен Имангельдыева Томирис 11 «а» сынып оқушылары жүлделі 3-ші орынды иеленсе, география пәнінен Бажыбаев Азат 2-ші орын алды. Оқушыларымыздың жоғары нәтиже көрсетуінде гимназия ұстаздары Омирбаева Д.М., Қусаинова Н.Ж., Акбаева Б.К., Зекенова Б.Ы., Хасенова Б.О. еңбегі мол. Алдағы оқу жылында осы құрамды сақтап және әрі қарай биылғы оқу жылынан да жоғары нәтиже көрсетуді жоспарлаудамыз. Ол мақсатта гимназиямызда кәсіптік мектеп жұмысы ұйымдастырылып, оған білікті де білімді ұстаздар топтастырылып, арнайы жоспары жасалып, кестесі құрылып, оған гимназиямыздың олимпиадалық командасымен дайындық жұмыстары жүргізілуде.

Жүлделі орын алған оқушыларымыз әрдайым биік шыңдардан көрініп, гимназияның абыройын асқақтата берсін деген тілектемін!



Тарих пәнінің мұғалімі,
Баршагүл ӨМІРЖАНҚЫЗЫ



Тілім деп тебіреніп ой қозғасам...



Қазақ қоғамы 70 жыл бойы орыстардың қол астында болып, тілімізден айырылып қала жаздадық. Біздің тіліміз халықаралық тіл болмаса да, өте бай тіл. Ғабит Мүсірепов айтқандай «Қазақ тілі бай тіл, теңеу-бейнелеулері ерте туған тіл». Бодан болған уақытында қазақ елі салт-дәстүрінен, ұстанымынан, тілінен, тіпті діні мен ділінен алыстады. Алаш арыстары болмаса тіпті, қол үзіп те қалар ма едік?! Мен үшін «Алашордашылар», Алаш арыстары – нағыз батырлар. Олар қазақ мектептерінің ашылуын сұрап, қазақ қоғамының басындағы рухани құлдырауды тоқтатуға бірден-бір еңбек сіңірді. Ахмет Байтұрсынұлы қазақ тілінің грамматикасын құрып, бізді сауатсыздықтан арашалап қалды. Бүгінге шүкір деймін, себебі қазір орыстардың өзі қазақ тілін үйреніп келеді. Біздің ана тіліміз халықаралық тіл болар ма екен деген арманым да жоқ емес. Тіліміздің ертеңін дамытатын, байрағын биіктететін біздер, жас жеткіншектер деп білемін!

Нұрдәулет АЙТУҒАН, 8«Б» сынып оқушысы

ТІЛ – ШКІР ҚҰРАЛЫ

Адам бір қоғамда өмір сүреді. Адамның өз өмірін жүзеге асыратын құрал ол – тіл. Қоғам мүшелері өз пікірін тіл арқылы жеткізеді. Тіл – ойлаудың қаруы, ойды білдіру құралы. Адам өмірінде тілсіз өмір сүру мүмкін емес. Өйткені, адам күнделікті өмірде тіл арқылы сөйлеседі, ойын жеткізеді. Тіл жоқ жерде адамдардың қоғамда бірлесіп еңбек етуі де мүмкін болмайды. Бұрынғы замандарда да адамдар тіл арқылы сөйлескен. Әр мемлекетте өздерінің тілдері қажет болған. Ал біздің тіліміз ол – қазақ тілі. Еркіндікке ұмтылған қай ел, қай халық та өз дауысымен сөйлеуді, өз үнімен жар салуды армандайды. Мемлекеттік тіл деп жариялағаннан кейін, тілімізді ел азаматтарының барлығы міндетті түрде білуі тиіс. Қай жұмысқа тұрсақ та барлық салада мемлекеттік тіл қолданылады. Адам өзі рухани дамыса, ол мемлекеттік тілі арқылы жасалады. Тіліміз өшпеу үшін, дамуы үшін ол мемлекеттің қамқорлығында болуы тиіс деп ойлаймын.

ТІЛ – ЕЛ БАЙЛЫҒЫ

Қазақ тілі – менің мақтанышым. Тіл әрбір адам үшін, әрбір ел үшін құдіретті. Тіл – тіршіліктің бастауы. Ол – атадан балаға мирас болып отырған құнсыз қазына. Бала алғаш тілді анасының айтқан бесік жырынан, айналадағы адамдардың оған тіл қатқанынан біледі. Қазір өзімді нағыз қазақтың деп отырсам да, мен кішкентай кезімде ана тілін мүлдем білмеген едім. Соған қарамастан, әжем мені әдейі қазақ мектебіне жіберді. Басында маған өте қиын болған еді. Өз тілім мен үшін жаңа тіл сияқты, қазақша сөйлейтін адамдар маған басқа адамдар сияқты көрінетін. Бірақ өзім ерік-жігерімнің арқасында қазір тілді жақсы меңгеріп алдым. Біздің тіліміз сондай бай, өте жағымды, даланың қоңыр самалындай есіп тұрады.

Қазақ тілінің қасиеті қазақ домбырасының үнімен үндесіп жатқандай баяу, жанға жағымды. Қазір жастарымыз орыс тілінде сөйлегенді жақсы көреді. Тіл құнары сұйыла түскен сияқты. Ендеше, атадан қалған мұрамыз – тіліміздің тағдыры біздің қолымызда. Өлтірмей, өміршең ету жолында аянбауымыз керек деймін!

Әлия ДАРИГУЛОВА,
9 «А» сынып оқушысы



Диана ҚҰРМАНАЛИНА,
9 «Ә» сынып оқушысы

Жаңа жыл - жаңа мақсаттардың, жаңа жоспарлардың бастауы.

Биылғы ит жылынан оқушыларымыз не күтеді екен, жалпы жаңа жылды қалай қарсы алады, бұл мерекенің олардың өміріндегі орны қандай екен деген сауалымызға оқушылар өз жауаптарын беріп кетті.

Мен үшін Жаңа жыл ғажайыпқа толы сиқырлы мереке. Кеткен жыл өкінішін өзімен ала кетіп, Жаңа жыл жақсы жаңалығымен келеді деген сенім, бұл мерекені ғажайыпқа толтырып тұрған сияқты. Менің ойымша, Жаңа жыл - ұлт таңдамайтын мереке. Өзім үшін ол көбіне бақыт әкелетіндей боп көрінеді. Біз отбасымызбен Жаңа жылды дастархан басында, өз ортамызда қарсы аламыз. Тура 12.00-ні күтуге кейде шыдамымыз, онымызға өкінбейміз де. Тек күнтізбенің жаңа парағы, Жаңа жылдан күтеріміз көп, барша адам бақытты болса екен!

Аделя ЖАКИШЕВА, 5 «Ә» сынып оқушысы

Жаңа жыл – мен үшін маңызы зор мереке. Кішкентай кезімнен бастап осы мерекені асыға күтемін. Әр жаңа жыл түнінде ғажайыпқа сеніп, түнде маған Аяз ата шынымен сыйлық қалдырып кетеді деп сенетінмін. Әпкем екеуіміз қар жауған күннен бастап, Аяз атаға хат жазатынбыз. Анамыз ол хатты Аяз атаға апарып беремін деп алдайтын еді. Өтірік те болса осы сенім менің бала жүрегіме соншалық қуаныш сыйлайтын еді. Біз үшін Жаңа жыл – отбасылық мереке. Әр күніміз жаңалықтар мен жақсылықтарға толы болса екен!

Айша ЗЕЙНОЛЛА, 5 «Ә» сынып оқушысы

Елбасының сөзін күтетін күн сияқты маған – Жаңа жыл. Себебі біз, отбасымызбен осы күні дастархан басына жианлып, елбасының тілегін естігеннен кейін ұйқыға жатамыз. Бұрындары менің нағашыларым Жаңа жыл күні бәс тігіп ойнайтын еді. Кім бәсте жеңілсе, сол Аяз ата болып киініп, үй-ішін думан қылатын. Ертеңіне шыршаның маңынан әркім өз сыйлығын алып, мәз-мейрам болатын. Есейгеніміз ба, бара-бара бұл дәстүріміз қалып барады. Жалпы Жаңа жыл – отбасылық мереке. Бұл күннен кез келген адам жақсылық күтеді. Еліміз амаң, жұртымыз тыныш болғай!

**Фатима САМАТҚЫЗЫ,
7 «Ә» сынып оқушысы**

Менің отбасымның өзіндік ерекшелігі бар. Сол ерекшелігіне сай біздің үйдің тойлайтын мерекелері де бөлек. Жаңа жыл мерекесі біз үшін тек қана күнтізбенің жаңа парағының ашылғаны сияқты. Сондай қатты мән беріп, от шашу шашып әбігерге түсеміз дей алмаймын. Сыйлық сыйлау міндетті түрде болады. Әкеміз бізді Жаңа жыл қарсаңында қыдыртып, қалағанымызды алып береді. Тек сағат 12.00-ні күтіп, Қыдыр атаны күткендей телміріп отырмаймыз. Бала кезіміздегідей бір ғажайыпқа да сенбейміз. Жаратқаннан Жаңа жылда тек жақсылықтар тілеймін. Еліміздің еңсесі биік, байрағы тұғырлы болсын!

**Айгерім ТЛЕШҚЫЗЫ,
7 «Ә» сынып оқушысы**

***Қағып тұр Жаңа жыл кеп есігіңді,
Болмайды той-думанның кеші мұңды.
Жаратқан түгел қылып берсін дейміз,
Бақыт пен ырысыңды, несібіңді!***



ЖАС ӨРКЕН – ЖАС ҚАЛАМ



Төлеу Айша
2 «А» сынып

Менің сүйікті ұстазым



Мен Мағжан Жұмабаев атындағы №39 гимназиясының 2 «А» сыныбында оқимын. Біздің ұстазымыз – Нуржигитова Айман Мұхсиновна. Ұстазымыз өскелең ұрпаққа білім берумен ұзақ жылдардан бері үзбей айналысып келеді, жаңартылған бағдарлама бойынша бізге білім береді, тәртіпті оқушы болуға тәрбиелейді. Сыныбымызда осы бағдарлама бойынша жаратылыстану пәнінен «Су. Ол қандай екен? Судың түрлі күйі» тақырыбында ашық сабақ өтті. Бізге сабақ өте қатты ұнады, судың маңыздылығын, «су – тіршілік көзі» екендігін терең түсіндік, судың түрлі күйі болатындығына тәжірибе жұмыстарын жасап, видео көрдік.

Әсіресе, маған сабақты бағалау баспалдағы өте қызықты болды, өте жақсы тілектер жазылған медальондарды иелендік. Менің ойымша сыныптастарым сабаққа өте белсенді қатысты.

Сонымен қатар 16 желтоқсан – Тәуелсіздік күніне 26 жыл толуына байланысты «Еліміздің еркіндігі – Тәуелсіздік» атты тәрбие сағаты өтті. Мен Қазақстанда тұрамын. Мен Қазақстанда білім алып жатырмын. Мен еліммен мақтанамын. Елімнің гүлдене бергенін қалаймын. Отанымызды, елімізді сүюге, бізді тәрбиелі, ұқыпты оқушы болуға, бір-бірімізге көмектесіп, сыйлауға үйреткен ұстазымызды сыйлаймын әрі жақсы көремін. Қашанда үлгілі оқушы болуға тырысамын.



Асқар Имат
2 «А» сынып оқушысы

ҚАЗАҚ ЕЛІМ

Көк жүзінде қалықтаған қыранмын,
Бейбітшілік пен татулық жыр әнім.
Самға менің қазақ елім – Қазақстан,
Шарықтай бер кең көлемде бұл әнім.
Әнұраны елімнің шақырады бірлікке,
Егеменді елімнің болашағы - бірлікте.



Нығметов Әділет
2 «А» сынып оқушысы

ЕЛІ СҮЙГЕН, ЕЛІН СҮЙГЕН – ЕЛБАСЫ

Елімнің көшбасшысы
Тәуелсіз қазақ елім,
Жайнай бер гажап елім.
Нұрсұлтан Назарбаев
Артамыз сізге сенім.

Елімнің көшбасшысы,
Біздерге ол сенеді.
Уәдені біз сақтаймыз,
Біз жастар құр жатпаймыз.
Үмітін еліміздің
Шынында біз ақтаймыз!



ТӘУЕЛСІЗДІККЕ ТАРТУЫМ



Туганбай Жасмин

2 «А» сынып оқушысы

ТӘУЕЛСІЗДІК – РУХЫ КҮШТІ ҒАЖАП КҮН
АРТТА ҚАЛДЫ ХАЛҚЫМ ТАРТҚАН АЗАП КҮН.
26 ЖЫЛ ТОЛДЫ БҮГІН СОЛ КҮНГЕ,
ШЫРҚАП АЙТАМ – ТӘУЕЛСІЗБІН, АЗАТПЫН.
ҚҰТТЫ БОЛСЫН АҒАЙЫН МЕРЕКЕМІЗ,
ТӘУЕЛСІЗДІК ТҰҒЫРЫНА ЖЕТКЕН КҮНІМІЗ.
ТІЛЕЙМІН МЕН БАРША ЖАНҒА БЕРЕКЕ,
ОТБАСЫДА БОЛСЫН ШАТТЫҚ – МЕРЕКЕ.



ТӘУЕЛСІЗДІГІМ – ТІРЕГІМ

Қазақстан Республикасының Тәуелсіздік күні – тарихы тереңде жатқан елдің жаңа заманда өз алдына қайта егеменді ел болған күні. Тәуелсіздік күні мерекесі әр жылдың 16 желтоқсанында аталып өтеді. Бұл күні ұлттық, мемлекеттік деңгейдегі елеулі мереке болғандықтан 16-17 желтоқсан күндері күнтізбеде демалыс болып табылады.

Тәуелсіз мемлекетке айналу бізге үлкен серпіліс, күш береді. Қазір біз өркендеудің жаңа жолына, әлеуметтік дамудың жаңа кезеңіне бет алдық. Сол бағытты ұстанып, болашаққа сеніммен қарайық!



Серікбек Әмина

2 «А» сынып оқушысы



Аликенова Молдір



Толу Айна



Толу Айна



Садықова Әмина



Өмірғали Асанәлі



Асқар Имат



Тәжібай Зере



Туганбай Жасмин



Серікбек Әмина



Сұлтанғалиева Жанель

**ТӘУЕЛСІЗДІК
КҮНІНЕ ОРАЙ
ЖАСАҒАН 2 «А» СЫНЫП
ОҚУШЫЛАРЫНЫҢ
ШЫҒАРМАШЫЛЫҚ
ЖҰМЫСТАРЫ**



РЕДАКТОРЛАР:

Мөлдір АЛЬЖАНОВА
Рауан БАСПАКОВА
Перизат ҚАБЫЛОВА

ДИЗАЙНЕР:

Мөлдір АЛЬЖАНОВА

АРНАЙЫ КОРРЕСПОНДЕНТТЕР:

Нұрдәулет АЙТУҒАН

Асыл АУКЕНОВА

Айым ЕРЖАН

МЕНШІКТІ ТІЛШІЛЕР:

Сабина ФАЙЗУЛЛАЕВА

Айгерім ТЛЕШҚЫЗЫ

Фатима САМАТҚЫЗЫ

МЕКЕН-ЖАЙЫМЫЗ:

100000, ҚАРАҒАНДЫ ҚАЛАСЫ,
СТЕПНОЙ-4 М/А, 33/2 ҮЙ.

М.ЖҰМАБАЕВ АТЫНДАҒЫ

№39 ГИМНАЗИЯ.

ТЕЛ: 32-68-42,

SCH39@KARGOO.KZ